


欽定八旗通志

人物志

卷一百

九十



欽定八旗通志卷一百九十

人物志七十

大臣傳五十六

漢軍鑲黃旗二 李興元 盧崇峻 佟國正 范承謨 張長庚

靳輔

李興元

李興元遼陽人隸漢軍鑲黃旗順治五年由拔貢

生授直隸沙河縣知縣卓異遷祁州知州游歷江

西吉安府知府康熙五年改補直隸永平府知府

查解逃人六十名以上敘功卽陞七年遷長蘆鹽
運使八年轉陝西隴右道十一年擢雲南按察使
時

命察釋藩下佔民間子女爲奴者與元力遵行十二年十
一月逆藩吳三桂反集衆脅受僞職與元厲聲抗
言曰汝內爲國戚外封親王受

恩最重何爲叛我丈夫可殺不可辱惟一死以報

朝廷吳逆囚之纍繫其家屬閱六載終不稍屈十八

年十月大兵恢復湖南時三桂已死逆孽世璠徙
興元於蒙化十九年大兵入黔逆勢日蹙僞閣部
郭壯圖棄黔回滇慮後患十月遣賊黨絞死興元
家口仍羈候二十年十月大兵困滇城興元二子
蔭秀奇秀俱被殺雲南平其第三子萃秀詣軍前
申訴二十一年巡撫王繼文察核得實具疏請卹
得

旨李興元贈太常寺卿廕一子入監讀書雍正七年入祀

昭忠祠乾隆十六年

特旨李興元雖從前未賞世職但爲國効忠情甚可憫
著加賞恩騎尉世襲罔替萃秀由廕生授四川廣安
州知州累遷湖廣安陸府知府元孫肇祥襲恩騎
尉由鑾儀衛治儀正授直隸懷柔都司調八溝都
司四十一年遷廣東韶州遊擊

盧崇峻

盧崇峻漢軍鑲黃旗人祖國志明廣寧守備投誠

授三等輕車都尉崇峻初由官監生考授戶部副
理事官順治五年三月襲世職兼任佐領閏四月
遷禮部理事官三遇

恩詔加世職至三等男十一年授叅領十二年駐防京口
十三年擢吏部右侍郎十四年總督宣大軍務十
五年缺裁還京十八年授廣東總督康熙元年以
肇慶總兵缺裁請將所屬諸營歸附近各副將轄
允之時廣東多土寇依險竊發二年七月崇峻遣兵赴東

莞新安殲賊九百餘八月

命同都統宜里布查勘邊海九月復捕斬香山賊首趙劈石興寧賊首李宗韜而廣西賊首陸明初譚國經譚化春韋太寧等流入廣東之廉州猶寇掠爲害三年八月崇峻檄遊擊安邦等擊斬之會海賊蘇利旣降處碣石衛畏遷復叛九月崇峻與平南王尙可喜合兵搗勦擒利誅之得

旨嘉獎下部議敘十二月疏言化石一營額兵僅六百名

向設叅將守備各一千總二把總四兵少官多不符營制請裁叅將及把總二又石城地處衝要守備應駐石城分千把總各一駐化州聽高雷總兵轄部議如所請是月丁父憂

命在任守制四年三月勦海賊楊二等餘孽追至安南外境殲千三百餘燬船四十六又勦平新會新寧增城土賊四月追斬蠻寇李榮於海口降其衆四千餘並下部議敘尋疏言廣東邊界應各留一出海

之口由水路者香山縣以順德橫石磯爲日由陸路者廣南衛以城岡堡大鵬所以歸善淡水平海所以白雲墟海門所以潮陽南關爲口驗照放行便官軍糧道並嚴禁奸民出海部議從之是月崇峻以廣東連歲用兵請蠲康熙四年以前逋賦奉旨順治十八年以前拖欠錢糧已頒赦盡行蠲免今盧崇峻復將康熙四年以前積欠請蠲徇情於下殊爲不合著嚴飭行六月疏請勒無度牒僧道還俗開墾荒田

允之尋

命回京終制五年三月補河道總督五月疏言臣標三營專任防河兼備通漕遇事分遣四應康熙元年沂鎮總兵楊捷派防金鄉鉅野魚臺東平單縣陽穀六州縣舊無此例臣標兵祇二千五百餘名卽盡歸河干猶恐不敷調遣豈能兼顧懇將臣標官兵不許提鎮越管其分防者撤歸另於就近派撥再各省總督皆節制巡撫提鎮臣旣專管河道各提

督亦有防漕之責可否照例聽臣節制

詔下其疏於部以崇峻不合請節制提督

特旨嚴飭部議允撤河標分防州縣兵八月追平敘蘇利
功加一雲騎尉爲二等男十一月授山陝總督六
年八月丁祖母憂仍在任守制十月疏言前因西
番部落戀牧內地且布浮言臣親赴莊浪防禦現
在番衆俱歸原處駐牧其台吉等亦遣使服罪官
兵應撤報

聞十一月以捐銀助修通州城垣加兵部尙書銜十二月
奏准回京終制以違例取勘合擅支夫馬經兵部
劾奏

勅部議處八年八月

命吏部覆核各督撫功過部議以崇峻功少過多應降二
級調用得

旨削尙書銜留三等男世職隨旗行走十八年署副都統
隨大軍擊逆孽吳世璠黨於松滋縣復其城二十

年進取雲南二十一年還京二十二年授協領管
火器營事四十年卒子承祜降襲一等輕車都尉

佟國正

佟國正漢軍鑲黃旗人姓佟佳順治七年由拔貢
生授江南無爲州知州十二年遷直隸大名府知
府十六年遷廣東南韶道十七年調陝西延綏靖
邊道十八年牒陳四事一靖邊道轄七保二所屯
糧向由各保所將弁徵解道臣督催今奉

旨兵馬全歸提鎮錢糧專任撫臣請將屯糧改歸西路管

糧同知徵解一營保兵缺祇應募充不得勾屯民
妨農業一欠糧刁民往往投充營伍向來將弁猶
屬撫道甄別今文武不相統攝難保無匿庇情弊
請嗣後許移文將領追究若該管狗庇立即揭叅
一請邊道之設向以稽核兵馬整飭邊防今官兵
旣歸提鎮管攝錢糧請改同知徵解道臣已屬冗
員乞裁汰巡撫張中第據牒以

聞下部議從之康熙二年改補江南淮海道三年遷安徽按察使十三年遷江西布政使時逆藩吳三桂耿精忠相繼叛賊兵分犯江西會巡撫白色純卒大將軍安親王岳樂奏國正甚得民心

特擢江西巡撫十五年正月大將軍簡親王喇布言贛州爲江西門戶投誠將士雜處彈壓需人

詔國正赴贛州駐守十一月廣東從逆提督嚴自明總兵張星耀等糾眾偏南康國正遣副將許盛等勦賊

于庫鎮鋪破其營十七追七十餘里斬獲甚衆賊遁走南安逆黨黃土標王割耳等犯信豐國正遣守備楊以松與副將周球分三路擊之斬首二千餘賊潰竄南雄十二月遣許盛等勦上猶賊復其城又遣周球等擊敗僞將郭應輔于黃土關斬賊五千復龍泉縣龍泉舊以守備駐防國正言地介邊鄙密爾湖南桂東守備不足彈壓請改設遊擊從之是年遣隨征官馬贊招降僞副將羅復彪都

司張元仁總兵劉永琪等國正聞大兵克復汀州
恐賊竄入贛州密飭營汛嚴守並分遣叅將劉體
君及周球等由間道相機恢勦十六年正月大破
賊于五里排復會昌縣偽總兵楊夢月降尋復瑞
金縣先後招撫偽總兵賴鼎球等百五十二人兵
萬六千五月復崇義縣招降偽總兵賴榮等十七
人兵萬餘逆賊韓大任自寧都敗竄萬安國正慮
逸入楚境密調兵赴良口大王廟黃塘截其歸路

別遣將繞出興國縣田村大江口斷賊糧道賊窘
甚竄突復遣遊擊楊以松等四路追勦十二月擊
賊于鷓鴣寨十七年正月追至老虎洞大敗之大
任窮蹙走汀州詣康親王傑書軍門降江西平國
正還省城八月敘功加兵部右侍郎銜十月加兵
部尙書銜授正一品階十八年正月左副都御史
楊雍建以江右爲衝繁要地國正蒞任數載治蹟
無聞流移未能盡復田野未能盡闢分牧之有司

未盡奉法請

勅令國正

陛見詢以地方利弊民生休戚國正之庸碌無能難逃

睿鑒

詔國正明白回奏時舉行京察國正遵例自陳

上以國正才力不及降二級調用覆疏入部議國正已降

調毋庸議四十七年正月卒于家

范承謨

范承謨漢軍鑲黃旗人大學士范文程第二子也

初任侍衛順治八年更定八旗漢軍考試之例承

謨中式舉人明年成進士選庶吉士授宏文院編

修十二年遷秘書院侍讀學士十八年

聖祖仁皇帝御極擢國史院學士康熙三年以疾乞假尋

補秘書院學士教習庶吉士充纂修

世祖章皇帝實錄副總裁官七年授浙江巡撫九年杭州

嘉興湖州紹興諸府被水承謨奏貸藩庫銀八萬

兩糴米湖廣以平糶應徵漕米請每石折銀一兩
於明年麥熟後徵解其白糧分二年帶徵被災重
者如例蠲免並得

旨允行先是寧波金華衢台溫處諸府屬荒田以前任總
督趙廷臣請除額賦有

旨令承謨履勘至是承謨遍歷其地奏豁荒棄田地二十
九萬四千六百餘畝水衝缺額田地二萬一千九
百餘畝十年以疾請解任

命乘驛回京調理浙江總督劉兆麒提督塞白理各疏言
浙省年來當荒歉時而民生不致重困者皆撫臣
承謨之力今以病請告百姓投詞攀留積一百五
十餘紙不敢壅於上聞給事中美希轍柯聳御史
何元英等亦言承謨受事三載愛民如子餽遺請
謁不通劾奏貪墨廉治巨猾剔除加耗陋規私派
積弊單騎勘荒悉心賑恤浙人愛戴深於飢渴今
雖積勞致疾懇

欽定八旗通志 卷一百九十一 人物志七十一
特勅勉留

上諭吏部日前因浙江巡撫范承謨以患病具奏准其回京調理今據督提等奏稱百姓愛戴號泣請留情詞懇切特順民情仍留原任十一年八月承謨疏言浙省徵輸白糧其加耗多寡不一湖州每石加五斗五升嘉興每石加入斗爲運丁春辦諸費請嗣後令糧戶以春白米輸納概限加耗四斗五升又請豁台溫二衛康熙九年以前荒逋銀兩及石門平陽未

完輕齋月糧等項皆下戶部議行十月擢福建總督承謨以海疆重任難副辭

上弗允因疏請

陛見十二年七月至京

召對承謨奏舊疾未痊

上遣御醫診視

賜藥餌逾月疾稍愈

命馳赴新任

賜冠服鞍馬

遣侍衛烏丹傳諭曰爾向有賢聲與他人不同且福建邊疆重地海氛未靖爾其益加勉厲副朕委任初福建總督駐漳州至是將撤靖南藩屬還京

特命移駐福州承謨奏携其家舊

賜蒙古壯勇八十餘人以行甫抵任聞逆藩吳三桂反承謨察耿精忠有異志綜計督標兵少又與精忠所部習不足恃乃疏言閩省經制兵自康熙八年依

部議裁汰已及三千餘名尙應裁二千五百餘名現在兵單汎廣請暫停裁汰遇缺以投誠人充補又請巡行海濱酌寬邊界令民開墾分遣鎮兵屯種隙地以裕軍餉疏上未及行精忠已叛先佯言海寇至邀承謨議事巡撫劉秉政陰附精忠促承謨行承謨知有變左右請環甲以從承謨曰衆寡不敵備無益也乃坦然按轡至則逆衆蜂屯露刃承謨挺身前抗辭罵賊精忠困以桎梏閉之隘室

金定人傳通志 卷一百九十一 人物志七十 三
晝夜防伺甚密使毋死承謨罵不絕口一日精忠
遣秉政說之降承謨奮足蹴秉政仆地叱左右掖
出曰賊誅戮將不遠茲先視其魄矣爲賊困踰二
年冠

賜冠衣辭母時衣每朔望奉時憲書一冊懸之北面跪拜
間爲詩文以桴炭畫壁上當承謨甫爲賊困時部
曲有張福建者手雙刀奮呼奪門連斃賊人力竭
被執死又蒙古人嘛呢爲僞散騎郎精忠遣之守

承謨感承謨忠義謀使出走事泄精忠將磔之嘛
呢大言曰吾寧與忠臣俱死不願與爾逆賊同生
及大兵破仙霞關精忠將降飾辭免死忌承謨
暴其罪惡夜遣逆黨逼承謨就縊幕賓無錫嵇永
仁會稽王龍光華亭沈天成從弟承譜及親屬家
丁隸卒五十三人並遇害賊移屍焚諸野泰寧騎
兵許鼎乘夜負承謨燼骸藏之明年櫬還京

上遣內大臣侍衛奠酒福建巡撫楊熙疏列耿精忠叛後

獸內死事諸臣爲承謨請優卹總督郎廷相復專疏言承謨於康熙十三年三月精忠邀以會商公事脅之從逆承謨憤怒不屈遂遭羈繫至十五年九月十六日夜半精忠遣人縊之承謨猶言父賊國宗主恩未報整衣冠叩首然後就縊親屬幕賓及隨從諸人盡被賊縊死閩人追思其任總督時多愛民惠政聞遭慘變每酸心掩泣言之其純忠勁節久而愈堅富貴榮利不能動其心妻子昆弟不足繫其慮

視倉卒遇變激烈捐軀者更未易多得乞

勅部優加贈謚卹廕並於閩省立祠褒祀以慰人心詔所司優議贈兵部尙書加太子少保廕一子入監賜祭葬如典禮謚忠貞

御書碑文賜其家三十四年福建巡撫卞永譽以士民籲建專祠於州入奏

御書忠貞炳日以額其祠四十七年承謨子時崇官廣東巡撫復疏述前此福建督撫爲嵇永仁等請贈部

臣以生員無贈銜例寢議乞

特勅追贈入祠於是贈嵇永仁王龍光沈天成范承譜國

子監助教學正有差並從祀承謨祠

世宗憲皇帝時以承謨與嵇永仁等人祀昭忠祠承謨所

著有吾廬稿浙閩奏議百苦吟畫壁集

聖祖仁皇帝又嘗允時崇請

御製承謨畫壁集序曰朕惟帝王教化首重名節所以

維繫人心扶樹綱紀也古人臣以身事主守土膺疆或

遇蝥賊潛生豺狼勃起則捐軀矢志取義成仁而其激烈

慷慨之氣間發爲文辭雖質直無華後世論錄終有不

可泯滅者以其出於忠義之誠本乎性情之正也福建

總督范承謨名臣之子授節閩海方值逆豎盜兵偏隅

煽焰籌畧未展橫罹幽繫閱三寒暑貞操彌堅故其矚

然不泯之志縈紆鬱屈無所據露乃以墻壁爲書箋以

桴薪爲筆墨題分甲乙字辨衡從日月旣深篇章漸積

名曰畫壁記實也卒能終始不撓歸於正命若承謨者

可謂冒白刃而不疑守丹心而自信者矣夫以茹荼含
藥之餘每念不忘君父故詩文不必盡合於古之作者
而浩然之氣流行充溢當其胸填聲咽髮植風生土塊
灰丸同於利劔禿豪斷梗等比雙矛寫忠孝之性靈奪
奸凶之殘魄是又豈刻雕藻繪塗飾虛浮者之所能及
乎自三逆殄滅寰宇謚寧卹典頻加恩綸屢降固已延
賞後昆光賁泉壤矣茲特允其子時崇所請復爲序其
存稿蓋善善欲長春秋之義弁章特錫數出非常庶幾

追妥忠魂亦以風厲臣節焉

張長庚

張長庚漢軍鑲黃旗人由秘書院編修順治八年
遷宏文院侍讀十年遷秘書院侍讀學士兼佐領
十一年遷國史院學士十二年充

殿試讀卷官十三年擢湖廣巡撫十四年疏報墾田
八千三百七十五頃下部議敘十五年十二月以
荊州安陸襄陽岳州等府水災請蠲免十六年春

復久雨成災荆安襄岳等府災民流至武昌漢陽
長庚同巡按李廷松總督李廕祖倡議捐賑長庚
捐米千二百五十石錢三百二十五千下部議敘
加太子少保兵部尚書銜十七年四月授湖廣總
督康熙元年八月疏請裁駐岳州之上江防道從
之湖廣舊設巡撫二員又因川陝河南三省疆隅
相接設撫治一員科臣姚啟聖請援江南陝西之
例分湖北湖南兩巡撫

勅長庚詳確定議長庚議以湖北之武昌漢陽黃州安陸
德安荊州襄陽鄖陽八府屬湖北巡撫轄以湖南
之長沙衡州永州寶慶辰州常德岳州七府郴靖
二州屬偏沅巡撫轄刑名錢穀各歸管理部議如
所請並裁鄖陽撫治缺

上允之二年長庚同靖西將軍穆里瑪定西將軍圖海等
擒斬明桂王將郝搖旗劉汝魁其黨李來亨竄伏
茅麓山官兵晝夜環攻來亨窮迫舉家焚縊長庚

招撫餘黨併以書招降桂王之荆國公王光興等
楚寇悉平下部察敘先是湖廣設左右布政使二
按察使一駐武昌二年三月移右布政司駐長沙
上以湖廣刑名事繁應增設按察使一其駐地令督撫議
奏長庚疏言增設臬司應照藩司例駐長沙專理
湖南長沙等七府及都靖二州刑名十一月又言
房縣保康竹山竹溪興山巴東歸州一帶皆楚
省邊險地前逆寇盤據今已蕩平新闢州縣宜設

兵資保障請酌撥荆襄四鎮額兵駐防要地
俱奉

旨俞允四年五月疏給歸州巴東長陽興山房縣保康竹
溪竹山等八州縣流民開墾牛種部議行十月疏
報墾田六千頃有奇部議加一級六年四月

上諭查各省大小船按兵定數長庚疏言湖廣各營戰馬
礮船共四百七十五內除襄陵荊州城守襄陽均
房辰沅常岳等鎮協營戰馬礮船二百三十三應

全留外其提督與武昌城守宜都洞庭等標協營
 戰馬礮船二百四十二內應裁六十二又內有督
 提二標船三十三酌歸荊州武昌城守及漢陽守
 備就近管理如所請行八年九月甄別各省督撫
 奉

旨張長庚以原品隨旗行走十二年二月戶部以長庚前
 捏報墾荒叅奏削太子少保銜十九年二月大兵
 進勦雲貴

上以長庚於軍中著有能聲

命署副都統領兵赴之會川東賊譚洪復叛

命吏部郎中范承勳追趣長庚兼程赴彝陵擊賊十一月

洪犯夔州掠取糧艘

上以夔州乃運糧要地令長庚同護軍統領佟佳達取夔

州會洪死餘黨就戮川東平將軍趙良棟請酌撤

滿兵而以其半進取雲貴長庚在軍無功亦撤回

未幾卒

靳輔

靳輔漢軍鑲黃旗人父應選官通政使司叅議輔由官學生於順治九年考授國史院編修十五年改內閣中書尋遷兵部員外郎康熙元年遷郎中七年遷通政使司右通政明年擢國史院學士充纂修

世祖章皇帝實錄副總裁九年十月改內閣學士十年六月授安徽巡撫十一年四月奏臨淮靈璧二縣虛

報開墾田四千六百餘頃請

旨豁免田糧從之十三年逆藩吳三桂耿精忠分寇江西煽誘饒州弁兵從逆

上詔輔增兵接壤防守輔尋遣兵會勦擒斬欽縣賊宋鏢等十五年二月疏言戶兵二部因軍需浩繁令裁驛站經費臣以爲欲省經費宜先除糜費節省十之八臣非要務勿專差齎奏則火牌糜費節省十之八京差官員酌量併減卽解餉解礮沿途自有官兵

護送亦止需部差一員則勘合糜費節省十之三
嚴禁各員役橫索騷擾則節省無名之費更多安
徽所屬驛站額銀二十六萬兩有奇以十分之四
科之歲省十萬餘兩通天下計之每歲所節當不
下百餘萬可以裕軍餉甦驛困得

旨驛遞繁苦皆由差員橫索騷擾著嚴行飭禁下部詳議
如所奏定爲例是年疏報存留各屬損腳等項銀
十一萬七千餘兩節省驛站銀十二萬九千餘兩

得

旨靳輔節省存留驛站各項錢糧爲數甚多具見實心任
事下部議敘加兵部尚書銜十六年三月授河道總督
七月疏言黃河之水裹沙而行水合則流急而沙
隨水去水分則流緩沙停河底日高故全賴各處
清水併力助刷始能奔趨歸海而無滯歸仁一隄
原以障睢水及永堦邸家白鹿諸湖水不使侵淮
且令有小河口白洋河入黃刷沙自順治十六年

歸仁隄潰睢湖諸水侵淮不復入黃刷沙黃水從
小河口白洋河二處逆灌積沙漸成陸地康熙六
七年間王家營邢家口潰而黃水不由雲梯關入
海古溝翟家壩潰而淮水不赴清口會黃十五年
高家堰清水潭爛泥淺皆潰而運道益淤徐州
以下黃流緩弱散漫而河底益高矣謹以大修事
宜分列八疏一曰取土築堤使河寬深清江浦歷
雲梯關至海口河身泥淤須於兩旁離水三丈各

挑引河一道面濶八丈底濶二丈深一丈二尺卽
以掘取之土高築隄岸隄底七丈面濶三丈高二
丈二尺則黃淮下注中央既有舊存一二十丈河
身左右又各有八丈新鑿之河所存舊隄薄僅三
丈一經三面夾攻自可盡行刷去新舊之河合而
爲一河身寬至四十丈深至二丈可以漸復舊觀
其夫役請并令山東河南協募二曰開清口及爛
泥淺引河使得引淮刷黃三曰加築高家堰隄岸

金定人放進志 卷一百九十一
蓋欲堵決口不先修築殘隄恐水將尋隙奔潰而石工費甚浩繁板工不能耐久伏思水性至柔乘風則剛其板石諸工率皆陡峻故怒濤撞擊潰卽隨之惟遇坦坡乃平漫而上順縮而下隄制水而不抗水雖經大水乘風高低不虞激潰今於隄外近湖之處挑土帮築坦坡每隄高一丈築坦坡五丈卽有舊存椿木亦聽其埋於土內以爲隄骨夯杵堅實密布草根草子於其上俟其茂長則土益

堅隄益固四曰周橋閘至翟家壩共三十二里原衝支河九道及决口二十四處須次第堵塞臣驗各處埽工率用柳枝蘆草費大而不能經久伏思尅水者土也當求束土禦水之法改埽工爲蒲包裏土蒜繩捆紮而填之則費省而工亦堅固五曰深挑清口至清水潭二百三十里運道所挑之土俱傾於東西兩隄外卽以帮築西隄坦坡增培東隄堅厚六曰令淮揚田按上中下三則每畝納修

河銀三錢至二分有差商船來往淮揚兩關納剝
淺銀一年以米豆每石二分貨物每斤四分爲率
七日裁南河中河北河通惠四分司就近歸道員
管理裁管河同知山清安海宿桃三缺改併山旣
歸仁邳宿二員以重責成八日按里設兵晝隄分
守暇則栽柳蓄草添土幫隄每月乘濬船下鐵掃
帚刷河底淤沙督以員弁嚴立課程用期久遠疏
下王大臣議以軍務未竣大修募夫甚多宜暫停

上命輔熟籌輔復申前奏惟運土用夫請改爲車運遂皆
如所請

詔發帑興工輔乃開通清口爛泥淺引河四道濬清江浦
至雲梯關外河身創築束水隄一萬八千餘丈塞
于家岡武家墩高家堰諸決口河隄外加築縷隄
及格隄徐州宿遷築減水壩十三座其壩東西寬
十二丈南北長十八丈六尺中立礮心六座兩旁
俱用石墻土內密釘排椿灌以漿灰上鋪石板聯

以鐵錠每壩一座共成七洞每洞各寬一丈八尺計其洩水之地共十二丈六尺清水潭舊隄衝潰輔爲棄深就淺計築西隄九百二十餘丈東隄六百餘丈更挑新河長八百四十丈奏改名永安河又以甘羅城西運口黃流內灌易致停淤自新莊閘西南挑濬至太平壩又自文華寺挑濬至七里閘復轉而西南亦接至太平壩因達爛泥淺去淮黃交會之地十里計閱兩月工竣先是漕船由駱

馬湖行八十餘里始抵審灣夏秋則盛漲冬春則水涸重運多阻輔於湖旁疏濬阜河故道上接加河通運二十年三月以大修已越三年黃河未盡歸故道自請議處部議革職得

旨留任督修二十一年五月

上遣尙書伊桑阿侍郎宋文運等閱工並以候補布政使崔維雅隨往因其奏上河防芻議兩河治畧二書及條例二十四事欲改更輔所行減水壩諸法也

十月伊桑阿等還奏靳輔建議大修已用帑銀二百五十餘萬兩今蕭家渡決口未堵宿遷沐陽等處田地淹沒黃河不歸故道其言固難盡信崔維雅改議修築亦未必成功輔疏言河工次第告竣海口大闢下流疏通腹心之患已除蕭家渡決口堵塞亦易不宜有所更張因詳辯維雅陳二十四事不可行並下廷議工部尙書薩穆哈等請令輔賠修決口

上曰修治河工所需錢糧甚多靳輔果能賠修耶如必令賠修萬一貽誤漕運奈何朕思治淮尙易黃河身高於岸施工甚難崔維雅條奏二十四款朕初覽時似有可取及覽靳輔回奏崔維雅所奏誠無可行者因召輔來京十一月輔至奏蕭家渡決口明年正月可塞崔維雅所議挑河每日用夫四十萬築隄以十二丈爲準斷不可行

上是之

特旨寬免賠修决口仍給帑堵築二十二年四月疏報蕭家渡工成河歸故道請修七里溝險汛天妃壩王公隄等閘座又請增開封歸德隄工以防上流壅滯

諭曰河道關係國計民生最爲緊要今聞河流得歸故道深爲可喜以後益宜嚴愆勿致疎防十二月

詔復原職二十三年十月

上南巡閱河

諭輔曰朕觀高家堰地勢高於寶應高郵數倍前人於此築石隄障水實爲淮揚屏蔽且使洪澤湖與淮水并力敵黃衝刷淤沙關係最重今高堰舊口及周橋翟壩修築雖久仍須歲歲防護不可輕視以隳前功又

諭曰數年以來治河著有成效黽勉盡力朕已悉知此後當益加勉勵早告成功使百姓各安舊業庶不負朕委任至意因

御書閱河隄詩賜之二十四年正月疏請添建黃河南岸

卷一百九十一
毛城鋪減水閘一王家山十八里屯減水閘三北
岸大谷山減水閘二以保徐州上流隄工並於歸
仁隄添建石壩二欄馬河及清河運口各添建石
閘一九月疏言勘閱河南隄岸考城儀封陽武三
縣應幫築隄工七千九百八十九丈封邱縣荆隆
口應築大月隄三百三十丈滎澤縣應修築埽工
二百一十丈以防上流異漲並請增設蘭陽儀封
滎澤河員免開封歸德二府居民採辦青柳事下

部議俱從之是時

上念高郵寶應諸州縣湖水泛濫民田被淹

命安徽按察使于成龍經理海口及下河事宜仍聽輔節

制輔疏言下河卑於海潮五尺疏海口則引潮內
侵大不便請自高郵城東車邏鎮築長隄二厯興
化白駒場至海口東所洩之水入海隄內涸出田
畝丈量還民其餘田招民屯墾以抵經費廷議如
所請

召輔及于成龍至京成龍力主開濬海口故道輔仍議築
長隄高一丈五尺束水敵海潮大學士九卿俱從
輔議通政使叅議成其範給事中王又旦御史錢
珏從成龍議時寶應人侍讀喬萊奏輔議非是乃
命尙書薩穆哈等勸視尋以開海口無益回奏會江寧巡
撫湯斌入爲尙書奏下河宜濬

上命侍郎孫在豐往董其事二十六年七月

詔詢下河田疇何策可行水患輔疏言宋元以前高郵寶

應諸湖原皆田疇臣前堵築清水潭深挑兩隄中
間河底有宋元舊錢及輒井石街其爲民居可證
蓋黃河在宋元時雖南侵而尙未全徙至明代始
絕北流南奪淮渠以入海至淮水壅不得下清河
縣之洪澤村漫淹而爲洪澤湖又從高家堰翟家
壩旁流東注爲高郵寶應諸湖自此永不復田疇
之舊且爲患於下河矣臣屢經測驗運河隄頂卑
於高堰隄頂一丈有奇故減水壩之建在堰隄可

澗水一千方在運隄則使可澗水一千二百方所以歷七年之久三遭大漲而運隄安然無恙運隄所澗之水以下河爲壑下河之東卽大海濬海口似可紓水患然自清江浦南行三百餘里至江都縣之茱萸灣折而東百餘里至泰州又百餘里至海安鎮折而北卽范公隄沿隄而行歷安豐東臺河塚丁溪白駒劉莊等場計二百餘里而抵鹽城縣又北行百餘里而至廟灣場折而西百餘里爲

蘇家嘴又百餘里仍回清江浦計程千里有奇惟廟灣天妃石礎三口向係澗水入海之處必登舟過渡餘皆可以馳馬之路其卑處於周圍馬路中者南北三百餘里東西二百餘里形如釜底止就釜底挑挖徒增釜底之深當淮流盛漲高堰澗水洶湧而來仍不能救民田之淹沒臣與幕友陳潢反覆曲籌杜患於流不若杜患於源高家堰之隄外直東爲下河東北爲清口當自翟家壩起歷塘

堽古溝周橋閘高長澗高家堰築重隄一道約高一丈七八尺至二丈不等長一萬六千丈需費七十九萬五千兩此工一成東堰隄減下之水使北出清口則洪澤湖之水不復東淹下河其下河十餘萬頃之地可變成沃產而高寶諸湖俱可涸出田畝數千頃招人屯墾可以裕河庫且高堰原爲最險之工增此隄則長年保護洪澤湖廣澗非常一遇風起多覆舟沉溺行人此隄內之河則避湖

險而就安流有便於商民者甚大至臣幕友陳潢
前逢

聖駕閱工臣以姓名上達

宸聰其間興工之委曲及將來竣工非陳潢協力區畫不可念臣垂老多病萬一卽滇溝壑或病臥不能馳驅則繼臣司河者仍必得陳潢在幕佐之庶不岐誤此臣十年以來之血誠欲吐而未敢者今豫爲陳明非僅居功蔽賢之念不忍萌卽引嫌避忌之

私亦不敢計疏下廷議如所請並

賜陳潢僉事道銜時于成龍任直隸巡撫

詔以輔疏示詢成龍言下河宜開重隄不宜築

上遣尙書佛倫侍郎熊一瀟給事中達奇納趙吉士與總

督董訥總漕慕天顏會勘天顏在豐議與輔相左

佛倫等以應從輔請還奏仍下九卿會議二十七

年正月御史郭琇疏言海宇昇平萬邦底定

宵旰殷憂時切如傷之念者止此一線黃河與淮揚等州

縣昏墊之黎民耳

皇上委任河臣靳輔靳輔則聽命於幕客陳潢如果洪水

歸洋狂瀾永息猶得有辭乃今日議築隄明日議

挑濬糜費帑金數百萬終無底止之期今日題河

道明日題河聽以

朝廷爵位爲私恩從未聞有得人之效又復攘奪民

田妄稱屯墾橫取米麥越境貨賣

皇上以下河爲必可開而靳輔百計阻撓欲令功垂成而

皇上洞知其累民會勸諸臣亦知其累民則靳輔陳潢之

罪瞭如指掌矣陳潢爲靳輔營一家之謀於

國計民生全無裨益忌功之念重圖利之心堅真

國之蠹而民之讐也監司僉事何等尊貴豈容一介

小人冒濫名器以快靳輔酬報私情宜卽斥革

勅部嚴加處分另簡大臣之清廉敏練者整理河務庶成

功可奏生靈永利矣疏下九卿察議二月給事中

劉楷疏言河工道廳至雜職百十餘員題補之權

總歸河臣使其虛已求才果能奏安瀾之效猶且

不可久擅用人大權乃在在保舉及至任事漫無

寸功惟見每歲報衝決而已嗣後大小河官應仍

由吏部選補御史陸祖修疏言

皇上每遇緊要政事令九卿會議期於衆論僉同至當不

易無奈河臣靳輔身雖在外而呼吸甚靈九卿中

贊決異同者不過三四人皆左袒河臣不顧公議

如屯田一事悉依戶部尚書佛倫等所奏具稿籍
衆人之口伏思民間地畝各處例有在折起科並
無額外多餘之理直隸巡撫于成龍審事湖廣將
還倘蒙

親詢其間利病根由情弊始末可救東南七州縣昏墊之
民命省

內府幾百萬糜費之金錢河臣積惡已盈中外人心
總望

屠斷罷斥萬無議勞使過以重遲回昔帝舜殛鯀以其逆
水之性也今兼有屯田害民之事去一斬輔天下
萬世仰頌

聖明無踰此矣時慕天顏孫在豐亦疏論屯田累民及輔
阻撓下河開濬事

詔俟于成龍至會議一併嚴察輔尋得請入
覲先疏論于成龍慕天顏孫在豐朋謀陷害又自辯受
命治河之日正當兩河壞極之時自錫山以抵海口南北

金定八旗通 卷一百九
兩岸決口七八十處高家堰決口三十四處翟家
壩成河九道清水潭久潰下河七州縣一望汪洋
清口運河變爲陸地臣晝夜奔馳先堵高家堰淮
水方出清口旋堵清水潭挑挖運河改移運口迄
今永遠深通其向來行運之駱馬湖淤淺不能行
舟臣創開阜河漕艘無阻久蒙

聖鑒至濬築經費方臣未任之初曾

特遣部臣履勘估計六百萬兩臣任事後苦心節省自徐

州起直抵海口兩岸隄工并高家堰清水潭及前
所未估之新開阜河堵塞楊家莊修築歸仁隄改
移運口止用帑二百五十一萬兩又蕭家渡衝決
時蒙

賜帑一百二十萬兩令一槩加修竣工統計所用僅及前
此部臣估計之半而臺臣郭琇則曰糜費帑金數
百萬營一家之計不知何所見而誣臣至此極也
其曰題道題聽未聞得人則河員原因慎重河務

必由河臣保題定例已久非自臣始其曰奪田屯墾則臣絕不以納糧之民田分釐入屯其曰越境賣麥則臣原以變價還部題明其曰陳潢小人冒濫名器則陳潢之蒙

恩實出鼓勵人才之

特典以言冒濫臣不知何所指且詆之爲小人則固于成龍久與結拜弟兄慕天顏頗與宴好殷勤孫在豐亦與親密異常者也自康熙二十二年兩河歸故

運道通行而郭琇必以洪水狂瀾罪臣科臣劉楷曰惟見每歲報衝決臺臣陸祖修曰逆水之性又謂清丈隱佔非額外多餘地畝蓋郭琇與孫在豐爲庚戌科同年陸祖修爲諸生時拜慕天顏爲師又係孫在豐教習門生劉楷陸祖修己未科同年並江南人與隱佔田畝者無非桑梓親戚年譜之契故彼呼此應協力陷臣慕天顏與孫在豐結婚姻因于成龍倡開海口之議故必欲附成龍以攻

金定人始通志 卷一百九
臣而助在豐兼奪臣任夫河臣之職與督撫不同
督撫統攝地方諸務稍一與利除弊易以見德河
臣頻年奔走河濱以挑築爲務上費帑金下役民
力最易招尤致謗而臣之負謗更因屯田之清丈
隱佔隱佔地畝惟山陽最多有京田時田之分時
田一畝納一畝之糧係小民之業京田四畝納一
畝之糧皆勢豪之業臣清丈沐陽海州宿遷桃源
清河五屬得二百萬畝至山陽則終不能丈以山

陽鄉紳多也臣不顧衆怒致讐謗沸騰使中傷臣
者更得以藉口然臣任事十餘年凡雇夫挑築買
辦物料皆給發現銀雖淮揚各屬隱佔田畝諸人
怨臣至深者亦不能指摘也伏念河工一事成之
甚難壞之甚易自康熙六年兩河潰決歷經數河
臣治之十餘年終無一效臣受任之初羣議蜂起
百計阻撓賴

皇上不惜帑金兼

授方畧而河得以復故正須綢繆善後而諸臣合計交攻
必欲陷臣殺臣而後已全不顧運道民生大計當
此衆口鑠金之際卽

皇上欲終始保全無如諸臣朋謀網陷之密布倘蒙

聖駕再巡

親閱隄工更

命重臣清丈隱佔地畝則臣與諸臣之是非功罪立分臣
身負重劾萬死一生幸得人

觀恐

天威咫尺不得盡吐所欲陳謹繕疏密奏疏入

上諭閣臣曰近因斬輔被劾議論其過者甚多斬輔若不

陳辯朕前復何所控告耶此疏並下九卿察議三月

上御乾清門

命輔與于成龍郭琇各陳所見于成龍言海口必應開濬

郭琇言屯田奪民產業

上曰屯田之事因取民餘田小民寔皆嗟怨斬輔當亦無

可置辯輔奏向者河旁田畝盡被水淹臣任事後將決口堵閉兩岸築隄河流故道無有衝決之患數年水淹之田盡皆涸出臣以民間原納租稅之額田給與本主其餘涸出田作為屯田抵補河工所用錢糧因屬吏奉行不善民怨是寔臣無可辯惟候處分

上曰各省民田未有不溢於納糧之額者若以餘田作屯豈不大擾民乎屯田不行無可復議至下河作何開濬

重隄應否停築九卿等公同詳酌確議尋

允九卿議停築重隄革輔職以福建總督王新命代之陳

潢革僉事道銜初漕船出清口入黃河行二百里始抵張莊運口輔奏於清河縣西仲家莊建閘上自宿遷桃源清河三縣黃河北岸遙縷二隄內加挑中河一道俾漕船既出清口截流徑渡北岸避黃河一百八十里之險溜由仲家莊閘內進中河歷阜河加河北上及工竣學士開音布侍衛馬武

往勘還奏中河商賈舟行不絕漕運可通

上諭廷臣曰前于成龍奏云靳輔開中河無益反爲民累河道已大壞今開音布等往勘則云數年以來河道未嘗衝決漕艘亦未有誤謂靳輔治河無裨益微獨靳輔不服朕亦不愜於心矣若王新命順從于成龍之說將原修工程盡行更改是各懷私忿必致貽誤河工乃

命尚書張玉書圖納等往勘確議還奏河身漸次刷深黃水迅溜入海其已建閘壩隄埽及已濬引河並應

如輔所定章程無庸更改十一月輔奉

命同工部尚書蘇赫等往閱通州運河請於沙河建閘蓄水通州下流築隄束水以利漕運從之二十八年

正月

上南巡閱河輔從行

諭詢中河逼近黃河水漲隄潰可虞輔奏前曾奉

諭籌攔馬河減水壩所出之水毋致淹沒民田臣開中河以束水兼令漕船避黃河險溜今若加築遙隄當

不至有患三月

諭吏部曰朕南巡時江南淮安人民皆稱譽前任河道總督靳輔思念不忘且見靳輔濬河深通築隄堅固寔心任事勞績昭然可復其原品二十九年三月漕運總督董訥以北運河水淺請盡洩南旺湖之水北流倉場侍郎凱音布以挑濬北運河奏請

上召問輔輔奏南旺湖水若使偏入北河必致南河水淺惟從北河兩旁下埽束水則水深自可濟運

詔卽以輔同凱音布經理之三十年九月奉

命與侍郎博壽李光地等閱黃河險工三十一年正月還

奏黃河南岸自徐州以上毛城鋪起至海口北岸

自大谷山起至雲梯關以下六套所有減水閘壩

現無衝損中河亦甚便漕船往來惟黃河南岸之

楊橫莊烟墩馬邏北岸之朱家莊安東縣便益門

南東門六處險工有未設月隄及下埽單薄處應

增築加倍並繪圖呈

覽下九卿議令河臣如所奏行二月王新命以勒取庫銀
爲運河同知陳良謨訐罷

上諭大學士曰朕聽政以來以三藩及河務漕運爲三大
事夙夜厪念會書而懸之宮中柱上至今尙存倘河務
不得其人一時漕運有誤關係非輕斬輔熟練河務及
其未甚老而用之亦得紓數年之慮其令仍爲河道總
督輔以衰病辭

命順天府丞徐廷璽同往協理六月疏言前奉

詔截留江北漕糧二十萬石由黃河運至山西蒲州發陝

西賑濟臣因開封以西黃河淺深無定與漕臣董

訥定議漕船三百八十四每船豫支下運行月銀

六十兩爲增雇剝船夫役之用共銀二萬二千四

十兩二月初自淮安開行臣於五月初赴開封督

飭催僱添雇民船隨淺隨剝撫臣閻興邦牒稱水

路止可運至孟津由孟津陸運至蒲州六百三十

里業經山陝兩省議明分運臣今赴孟津料理得

欽定四庫全書
卷一百一十一
言嘉其實心任事十月疏言黃河自河南滎澤縣至江南
清河縣兩岸各一千餘里其險工不可疎虞如南
岸之在開封或疎虞則黃水入淮歸德至宿遷或
疎虞則黃水入睢桃源清河間或疎虞則黃水入
洪澤湖以侵高堰倘高堰不固寶應高郵運道必
致淤墊故尙須籌畫萬全欲加築前此停築之重
隄爲費甚大惟就運料小河之隄加築高二丈廣
三丈乃可無患北岸之在滎澤或疎虞則黃水上

溢張秋下溢濟寧魚臺豐沛民田受淹宿遷清河
或疎虞則一百八十里之運道亦淤墊故中河遙
隄必須加築於西寧橋添建石閘二仲家莊陶家
莊兩閘左右各添一閘以備宣洩其張家舊運口
臣輔前挑中河口曾議設閘因解任未舉行恐將
來山東之水微弱致中河淺澁今宜竟行堵塞就
駱馬湖之東中河之南建閘值東水大長開以洩
之東水消落閉以蓄之庶無他慮又疏言黃河隄

工莫重於既成之後隨時修補隄根積水易致汕刷惟於上流量挖一溝引沙直注使停再於下流量挖一溝引水分洩漸去其低窪處自然淤平臣輔前任時相度董家堂龍窩二處險工曾設涵洞引黃灌注於月隄裏使清水流在月隄外窪地遂成平陸徐州長樊大壩險工亦引黃內灌淤高窪地二三尺今邳州舊城迤西窪地周圍約有百里水無去路宜做已驗之法行之或慮掘隄難以修

防則建小閘以酌量引灌更爲萬全疏下九卿議以黃河水勢湍迅引灌邳州窪地似屬危險令再審籌餘如所請行又疏言臣前任安徽巡撫當軍興之際陳潢助理協宜及任總河值高家堰決口甚多翟家壩未堵二十餘里成河九道因盡行築隄塞河以敵清口之黃創設減水壩以保高堰之隄改清水潭隄工於湖內永保安瀾濬甘羅城運口至太平壩以避黃水內灌挑阜河二十餘里支

河三十里使駱馬湖不復淤墊又挑中河使漕船免黃河逆流之險凡臣所經營皆潢之計議仰荷聖主如天之福次第成功

恩授潢僉事道銜不意驟遭詆毀革去職銜旋即物故又奉

命勘河之尙書熊一瀟給事中達奇納趙吉士同時被指摘而去今臣已蒙

恩起復則無辜受累者當一體均邀

慈鑒疏下吏部陳潢已故寢議熊一瀟達奇納趙吉士並請

旨錄用時輔再疏自陳疾劇乞解任

命內大臣明珠往視傳

諭留淮調理十一月卒於官年六十遺疏至得

旨靳輔簡督河務經理年久黃淮兩河修築得宜運道民生俱有裨益患病溘逝深軫朕懷下部議卹

賜祭葬謚曰文襄二十五年河道總督董安國以江南士

民籲請捐資建祠河干入奏下部議行四十六年
上南巡還

諭吏部曰朕厯念河防屢行親閱凡自昔河道之源流治
河之得失按圖考績靡不周知粵從明季寇氛決黃灌
汴而洪流橫溢歲久不治迄於本朝在河諸臣未能殫
心修築以致康熙十四五年間黃淮交做海口漸淤朕
乃特命靳輔爲河道總督靳輔自受事以後斟酌時宜
相度形勢興建隄壩廣疏引河排衆議而不撓竭精勤

以自効於是淮黃故道次第修復而漕運大通其一切
經理之法具在雖嗣後河臣互有損益而規模措置不
能易也至於創開中河避黃河一百八十里波濤之險
因而漕輓安流商民利濟其有功於運道民生至大且
遠朕每莅河干徧加諮訪沿淮居民咸頌靳輔治績衆
口如一久而不衰夫人臣有大建樹於國家者獎勵酬
庸宜從優渥雖賜卹易名已循彝典尙應特予褒敘賁
以殊恩其加贈太子太保子騎都尉世職用彰朝廷追

美勞臣之典爲矢忠宣力者勸尋令其子治豫襲職准再襲二次

世宗憲皇帝雍正三年以治豫向隨父任明晰河務由副叅領加工部侍郎銜協理江南河工事務五年

諭閣臣曰朕覽治河方畧見原任河道總督靳輔昔年修理河工勞績茂著欲加恩澤以獎勲庸據吏部查奏康熙四十六年已贈宮保與世職今再追贈工部尙書子祭一次以示朕篤念前勞至意七年

命江蘇巡撫尹繼善擇地建祠祀輔及河道總督齊蘇勒有司春秋致祭八年

詔建賢良祠於京師以輔入祀

欽定八旗通志卷一百九十

